



Broj: 05/1-50-15-26-72-4/20

Sarajevo, 6. 7. 2020.

## IZVJEŠTAJ

### **sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Granične policije BiH**

Sastanak je održan 8. 6. 2020, s početkom u 13 sati, u prostorijama Granične policije BiH u Sarajevu. Prisustvovali su: Zoran Galić, direktor Granične policije BiH, Fahrudin Halač, zamjenik direktora Granične policije BiH, Dragan Kulić, pomoćnik direktora za organizaciju i operacije, Adisa Begić i Mate Miletić, članovi Nezavisnog odbora, te Ivana Lovrić, sekretarka Nezavisnog odbora.

Direktor Granične policije BiH Zoran Galić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Adisa Begić, članica Nezavisnog odbora, ukratko je obrazložila razlog posjete. Rekla je da je posjeta organizirana u skladu s dogovorom sa zadnje sjednice Nezavisnog odbora, ali i u skladu s Planom i programom rada Nezavisnog odbora za 2020. godinu, s ciljem održavanja kontinuiteta saradnje s policijskim agencijama iz svoje nadležnosti.

Također, naglasila je da je akcenat današnjeg razgovora na problematici koja se tiče migranata i ilegalnog prelaska granice kao i na aktivnostima koje je Granična policija BiH preduzimala u toku vanrednog stanja u BiH kada je u pitanju COVID-19.

Direktor Granične policije BiH na početku je istakao da su sa aspekta sigurnosti granične linije imali veliku ulogu kada je u pitanju COVID-19. U početnoj fazi su, shodno odlukama Vijeća ministara BiH, prilagođavali službu i policijske službenike na terenu. U tom poslu pomagali su im i službenici Uprave za inspeksijske poslove kojima su ustupili svoje prostorije na graničnim prijelazima.

Kad su u pitanju migranti, direktor je istakao da je za vrijeme vanrednog stanja u BiH, a radi pandemije virusa, znatno manji broj migranata ušao u zemlju u odnosu na isti period prošle godine, ali zadnjih 20-ak dana intenzitet se pojačava. Istakao je da je najkritičnije na istočnoj

granici (Zvornik, Višegrad i Bijeljina) te su veliki broj policijskih službenika usmjerili na te granične prijelaze. Naveo je da su samo jučer policijski službenici vratili više od 200 migranata s granice. Ako se migrant uhvati, veliki problem predstavlja i nemogućnost utvrđivanja njegovog identiteta. Istakao je i to da su tražili izmjene Zakona o graničnoj kontroli, u smislu podizanja ovlaštenja graničnim policajcima, ali od nadležnih institucija nisu dobili podršku. Direktor je, također, istakao da najveći broj migranata dolazi iz Pakistana, Maroka i Egipta, da je Sirija na 7. mjestu kao zemlja koja je pogođena ratnim dejstvima, te da se u velikom broju slučajeva radi o ekonomskim migrantima.

Kada je riječ o kadrovskoj popunjenosti i zaposlenim u ovoj policijskoj agenciji, direktor je naglasio hitnost rješavanja problema nedostatka policijskih službenika. Istakao je da su prije tri godine išli u reformu Pravilnika o unutrašnjoj organizaciji i sistematizaciji radnih mjesta, kojom se predviđalo da se smanji broj rukovodećih službenika, a poveća broj službenika na terenu. Međutim, taj prijedlog nije prošao resorno ministarstvo. Trenutno rade na novom pravilniku prema standardima Evropske unije kojim bi trebalo da imaju 1.200 policijskih službenika. Naglasio je da je trenutno jedan policijski službenik na 25 kilometara granične linije.

Dalje, istakli su da su od IPA fondova osigurali 2,5 miliona KM za prijem 300 kadeta (250 policijskih službenika i 50 inspektora), ali se čeka Vijeće ministara BiH koje bi trebalo donijeti odluku o prijemu da bi se krenulo u proceduru. Novčana sredstva bi trebala biti operativna u septembru.

U razgovoru s članovima Nezavisnog odbora rukovodstvo Granične policije osvrnulo se i na međuljudske odnose unutar ove policijske agencije kao i na anonimne pritužbe koje su nerijetko pristizale i Nezavisnom odboru. Istakli su da svaka anonimna predstavka koja pristigne prolazi provjeru unutrašnje kontrole.

Dalje u razgovoru direktor je naglasio da ima korektnu saradnju s drugim policijskim agencijama u BiH i Tužilaštvom BiH.

Članovi Nezavisnog odbora na kraju su naglasili da će Nezavisni odbor i dalje, u okviru svojih nadležnosti, pružati podršku radu Granične policije BiH i poželjeli im mnogo uspjeha.

Sastanak je završen u 14.30 sati.

**PRVI ZAMJENIK PREDsjedNICE  
NEZAVISNOG ODBORA**

Enes Obralića